

BUSINA' PAR AL CARVE' DU 2001

Ma iumni-ncu la vöeia
d'scrivi par al Carvè ?
La pöena cmè na föeia
li l-è-mma par druchè !

Trop eua l'i pasaia
a sutia tic i pont,
la Festa l'i smantiaia
e um -zò pì fèn nin cont.

I giuvu sa cui frega
dla festa dal Carvè,
in vöeru pì la bega
d'ampgnes ed fatighè !

E i vegg, pouar parsoenni,
lur sa chi poeru fè?
i han pochi uri boenni
e tanc mal da purtè !

E pira l'i-n-darmagi
smantiè darcò-l-Carvè;
um-zogna fes curagi
e des ancù da fè !

U i'è dal robi noèvi
da scrivi e da quinteli,
ados t'hai seinti piòevi
e i son neint titi beli.

Us dis, dha poura vaca,
us dis cl'i-mnia luca,
sta storia-n-uà c'la taca
la culpa a chi cl'ai tuca?

La vaca, sensa culpa,
la mangia sa ch'iá dan,
fareina dla su pulpa
chi cui la trà d'adnan?

La bestia qué l'i l'omi
tit ammà par fè i sold,
a l'ha i pei an su stomi
e u seint nì froeg nì coud !

Ma cui ch'-i-han fa-l-fareini
e cui ch'-i-han dà i parmöes
i portnu anfein dal peini
o i stan tranquil cmè pöes?

Ma pöe l'i neint finia
ui n'è tanti da di
cui ven l'Ave Maria
darcò d'in-atar-di.

U-i'è cui dal petrulieri
ch'impestu tera e mar,
al peini i son argeri
e i fan u schir e u ciar!

E ancura u i'è l'uraniu
che-l-bombi i han sbardlà
ansima tic i craniu
di vegg e dal masnà;

L'era in uraniu povar:
- cmè dì, poei manc tant brit -
l'ha rubà u sang cmè-n-ladar ...
Chisà sal fis stà ric!!

Que sus cambia neinta
al modu d'andè nan
pàta, fasoe e puleinta
chisà sui n'è-ncù-dman.

Certo pér la natira
la storia la-s-fa critica
la sarà semp pì dira
fina par la pulitica.

E que-nt'ista materia
chicos u i'è da dì:
A l'il na roba seria
l'as-poerni-ncù capì?

S'am sbalii neint um smia
quaranta e pì parti,
la fisni na busia
i'han neint ancù finì !

Partì dla margarita,
garofu e ciclamein
la röesa l'i neint brita
tant fiù da fè-n-giardein...!

E Bossi e Berlusconi,
te vai ampò-a-capì,
lur i son pes che-l-doni
nt'u niuu e nt'u sull.

Son cmè i ladar da Pisa
che d'dì-s-dan dal cutlà,
d'nöec poë i son chi e camisa
dacordi a fè i marcà!

Rutelli e Berlusconi,
t'an sai pi-n-uà ciapè;
des i'è surti Dantoni,
in at gal ant'al pulè.

Na vota u s'aspitava
tit l'an u dì d'Carvè
la geint la sa sfugava,
beivi, cantè, mangè.

Ades t'hai nin prublema,
se t'voëi vughi-l-Carvè,
t'hai manc na mesa gena
t'hai ammà d'anvisché

d'audi e d'nöec sut smia
la tu television
e tit al mond al cria
d'Carvè e d'Carvaron!

Ma nui as cunsuluma
conal sfilà dla moda
e tanti doni auguma
patanni e chi cui loda!

E-l-vesti? Sat voëi vughi
-l-vesti e palandranni?
a nt'la sfilata d'moda
ui-va -mmà-l-doni patanni...!

E dop ui ven San Remu
con tit al su canson,
me saroe d'ventà scemu,
i'an capis pì dabon!

Al Festival d'na vota
zsa au-dman l'era ghistà,
t'sintivi pì d'na nota
dal su canson pra-l-strà.

Ades stuma tic citu,
la geint l'an canta pì
spituma ormai ch'im bitu
na schifia d'noèc ed di !

E ades par cambié-l-bii
ui va la mi custansa,
que me-n-vöei pì fev rii
se no uv ven mal la pansa...!

Truncuma sta quintula
che umzò cantè e sunè,
mangiuma la biciula
chöecia par al Carvè!

E que,tic vegg e giuvu,
pra-l-piasi e par al strà,
truma -npò via u zsuvu
e fuma i mascarà!!

Baluma tic ansema,
fumla propri brandè,
criuma sensa flema
eviva u nost Carvè!!!

Carlo Pianti

M.B.S. - al mens d'Juva - oto 2001